



TEKS UCAPAN
YB DR. DZULKEFLY BIN AHMAD
MENTERI KESIHATAN MALAYSIA
SEMPENA
MAJLIS PERJUMPAAN PADA 05 JUN 2018
DEWAN SERBAGUNA, ARAS 8, BLOK E7, KKM

Terima kasih Yang Berusaha Saudara dan Saudari Pengacara Majlis,

YBhg. Dato' Seri Dr. Chen Chaw Min
Ketua Setiausaha,

YBhg. Datuk Dr. Noor Hisham bin Abdullah
Ketua Pengarah Kesihatan,

Timbalan-timbalan Ketua Setiausaha,
Timbalan-timbalan Ketua Pengarah Kesihatan,

Pegawai-Pegawai Kanan Kementerian,

Datuk/ Dato', tuan-tuan dan puan-puan yang dihormati sekalian.

Assalamualaikum Warahmatullahi Wabarakatuh dan Salam Sejahtera.

1. Terlebih dahulu saya ingin mengucapkan terima kasih kepada para hadirin kerana dapat bersama-sama berkumpul dalam Majlis Perjumpaan hari ini. Hari ini merupakan kali pertama saya sebagai

Menteri kesihatan berjumpa dengan seluruh warga kerja KKM. Ia adalah satu penghormatan bagi saya.

2. Kemenangan Pakatan Harapan ini adalah **keputusan dan kepercayaan rakyat** terhadap kerajaan Pakatan Harapan. Saya berharap kita semua boleh menghormati keputusan yang dibuat oleh rakyat Malaysia dan kita boleh bersama-sama bersatu hati, bersatu jiwa dan bersatu tenaga berkhidmat untuk Kementerian Kesihatan demi masa depan negara.
3. **Visi Pakatan Harapan** ialah sebuah negara yang bersatu padu dalam membela nasib Pribumi dan rakyat Malaysia pelbagai bangsa, agar pembangunan dan kesejahteraan ekonomi dapat dikongsi bersama secara adil dan saksama. Kerajaan Pakatan Harapan akan memastikan semua rakyat pelbagai bangsa dan agama dapat berkongsi hasil kemakmuran dan kemajuan negara secara adil dan saksama.
4. **Matlamat Pakatan Harapan** ialah untuk berganding bahu dalam memacu agenda reformasi berterusan untuk membentuk masa depan Malaysia yang lebih baik untuk semua, maju, makmur dan bahagia yang dicapai menerusi teras-teras fundamental seperti nilai-nilai yang dikongsi bersama, budaya ilmu, kebebasan, kebenaran, keadilan social dan ekonomi, maruah, ketamadunan, keamanan, perpaduan, kemakmuran, demokrasi, dan meritokrasi.
5. Kerajaan Pakatan Harapan bertekad untuk membina satu Bangsa Malaysia yang berasaskan semangat, amanah dan solidariti yang berteraskan **Wawasan 2020**.

6. **Wawasan negara** ini adalah untuk menjadi sebuah negara maju, merdeka dan dihormati di persada dunia. Kerajaan Pakatan Harapan akan membawa Malaysia ke wawasan baru dan seterusnya memacu Malaysia untuk kembali dikagumi dunia. Kerajaan Pakatan Harapan akan menjamin kesejahteraan hidup seluruh rakyat, tanpa mengira kaum, bangsa dan agama.

Tuan-tuan dan Puan-puan sekalian,

7. Janji Pakatan Harapan kepada rakyat Malaysia ialah untuk **membina negara dan memenuhi harapan** agar kita sekali lagi menjadi sebuah negara yang dikagumi oleh kawan dan lawan. Kerajaan Pakatan Harapan mempunyai 60 Janji berdasarkan **lima teras utama**, yang mana setiap satunya mempunyai langkah-langkah spesifik yang tersendiri, yang boleh diringkaskan seperti berikut:

Teras 1: Meringankan bebanan kehidupan rakyat

Teras 2: Mereformasi institusi pentadbiran dan politik

Teras 3: Merencanakan pertumbuhan ekonomi yang adil dan saksama

Teras 4: Mengembalikan status Sabah dan Sarawak berdasarkan Perjanjian Malaysia 1963

Teras 5: Membina Malaysia yang inklusif, moderat dan gemilang di persada dunia.

8. Sebagai langkah segera untuk melaksanakan janji-janji kami, Kerajaan Pakatan Harapan juga menggariskan **10 janji yang akan dilaksanakan dalam masa 100 hari** selepas pembentukan kerajaan Persekutuan seperti berikut:

- a. Menghapuskan GST dan mengurangkan kos sara hidup dengan pelbagai inisiatif peduli rakyat.
- b. Menstabilkan harga minyak dan memperkenalkan semula subsidi petrol secara bersasar.
- c. Menghapuskan hutang-hutang tidak wajar yang dipaksa ke atas peneroka FELDA
- d. Memperkenalkan skim caruman KWSP untuk suri rumah
- e. Menyamaratakan gaji minimum seluruh negara dan seterusnya memulakan proses meningkatkan gaji minimum.
- f. Menangguhkan pembayaran balik pinjaman PTPTN kepada semua peminjam yang mendapat gaji kurang dari RM4000 sebulan dan memansuhkan dasar senarai hitam ke atas peminjam.
- g. Menubuhkan Suruhanjaya Siasatan DiRaja 1MDB, FELDA, MARA dan Tabung Haji, dan merombak semula struktur kepimpinan mereka
- h. Menubuhkan Jawatankuasa Khas Kabinet untuk segera menyemak dan melaksanakan Perjanjian Malaysia 1963
- i. Melancarkan kajian terperinci mengenai projek-projek mega yang dianugerahkan kepada negara asing.
- j. Memperkenalkan Skim Peduli Sihat dengan memberi RM500 pembiayaan untuk rawatan asas di klinik swasta berdaftar untuk golongan B40.

Tuan-tuan dan Puan-puan sekalian,

9. **Janji ke-44 dalam Pakatan Harapan menyentuh perkara memperbaiki kualiti pendidikan dan khidmat kesihatan.** Kita difahamkan doktor-doktor yang dihantar ke Sabah dan Sarawak

biasanya adalah mereka yang masih baru dalam perkhidmatan. Walaupun mereka secara umumnya komited dalam perkhidmatan, tetapi mereka akan kembali ke semenanjung setelah memperolehi pengalaman. Ini menyebabkan kualiti perkhidmatan kesihatan di Sabah dan Sarawak tidak mencapai ekspektasi rakyat.

10. Kerajaan Pakatan Harapan akan memberi **keutamaan untuk melatih pegawai kesihatan daripada Sabah dan Sarawak**. Jika pertukaran terpaksa dilakukan, ia akan dilakukan berdasarkan keperluan, termasuklah menghantar pegawai-pegawai cemerlang ke sekolah atau pusat kesihatan yang memerlukan kepakaran mereka. Kerajaan Sabah dan Sarawak akan diberi hak membuat keputusan (*decision rights*) dalam hal ehwal pendidikan dan kesihatan.
11. Dalam urusan perkhidmatan kesihatan, **semua hospital awam akan dinaik taraf** agar boleh merawat lebih ramai pesakit, dan hospital-hospital terpilih akan dilengkapi dengan peralatan terkini untuk rawatan kardiovaskular dan barah. Sistem perolehan ubat-ubatan dan peralatan juga akan dipastikan lebih kompetitif agar harga termurah akan dibayar untuk ubat dan peralatan yang berkualiti tinggi.
12. Syarikat-syarikat milik kerajaan akan diminta untuk menyumbang dalam penambahbaikan premis dan infrastruktur pendidikan dan kesihatan, termasuklah memperbaiki sekolah-sekolah dan klinik-klinik kesihatan. Dana khas kerajaan juga akan digunakan untuk tujuan ini.

13. Saya menyeru agar penglibatan sector swasta dipertingkatkan dalam penjagaan kesihatan negara. Justeru, satu Majlis Penasihat Kesihatan akan dibentuk tidak lama lagi bagi menyemai satu sinergi antara sektor-sektor kesihatan awam dan swasta untuk kesejahteraan rakyat.

Tuan-tuan dan Puan-puan sekalian,

14. **Skim Insuran Peduli Sihat** yang berjaya dilaksanakan oleh Kerajaan Pakatan Harapan Negeri Selangor akan dikaji untuk dilaksanakan di seluruh Malaysia dengan keutamaan diberikan kepada penduduk luar bandar dan kawasan pedalaman.
15. Peserta Skim Peduli Sihat akan menerima manfaat pembiayaan rawatan kesihatan asas mengikut kategori keluarga dan individu. Kategori keluarga mendapat had pembiayaan setahun sebanyak RM500 dan had gunaan setiap kali rawatan adalah sebanyak RM50 manakala kategori individu mendapat had pembiayaan setahun sebanyak RM200 dan had gunaan setiap kali rawatan adalah sebanyak RM50.
16. Disamping itu, **Peduli Sihat Pejawat Awam (PSPA)** membolehkan pejawat awam untuk menerima rawatan kesihatan dan perubatan daripada hospital panel swasta. Kos rawatan kesihatan dan perubatan tersebut akan dibiayai oleh Kerajaan Negeri sehingga RM10,000 setahun seorang.

Tuan-tuan dan Puan-puan sekalian,

17. Sebelum saya mengakhiri perjumpaan pada pagi ini, saya ingin mengambil kesempatan untuk mengucapkan selamat menyambut **Bulan Ramadhan** dan selamat menjalani ibadah puasa sebulan kepada semua warga KKM yang beragama Islam. Saya turut mengucapkan selamat menyambut **Hari Ibu** pada 13 Mei yang lalu dan selamat menyambut **Hari Bapa Sedunia** pada 2 Jun yang lalu kepada semua warga KKM yang bergelar bapa-bapa.

18. Selain itu, Selamat Menyambut **Hari Keamatan untuk warga KKM yang berasal dari Sabah** pada 30 May yang lalu, Selamat Menyambut **Hari Gawai untuk warga KKM yang berasal dari Sarawak** pada 1 Jun yang lalu, dan selamat menyambut **Hari Raya Aidil Fitri** pada 15 Jun akan datang kepada seluruh warga KKM yang beragama Islam. Sesungguhnya perayaan-perayaan tersebut dapat meningkatkan persefahaman, toleransi, integrasi nasional seluruh warga Malaysia dalam mencapai kerukunan dan kemakmuran hidup bersama di dalam negara tercinta kita ini.

Sekian, terima kasih.

Disediakan oleh :

Unit Komunikasi Koporat

Tarikh Kemaskini : 31 Mei 2018